

Գողթնեցիք իրենք, սակայն, այլ կերպ էին մտածում: Կոտորածի լուրն առնելուն պէս՝ Ղազարի մարտական ուժերը շարժման մէջ դրւեցին,\*) և դեկտ. 27-ին, փոխվրէժի գայրոյթով լեցւած, յարձակեցին Փառակայից 3 վերստ հեռու գտնուող Բլաւ աւաղակաբարոյ թուրք գիւղի վրա, գիշերային գրոհով գրաւեցին ու ոչնչացրին նրան: Ու այնուհետև ամիսներ շարունակ, անընդհատ յարձակումներ էին գործում շրջակայ մահմետականութեան վրա՝ ահ ու սարսափի մատնելով, մանաւանդ օրդուբաթցիներին: Փոխվրէժը օրդուբաթցիներից՝ դարձաւ Գողթն ազատ մնացած վեց գիւղերի ոգևորութեան աղբիւրը: Նոյն նպատակի համար քայլեր էին առնւում և Ղափանում Գ. Նժդեհի կողմից: Մի քանի ամիս յետոյ, Ազուլիսի վրէժը լուծւեց:

---

\*) Հէնց ազուլեցիների պահանջով ինքնապաշտպանողական ուժերի ազդեցութիւնը չէր տարածում Ազուլիսների վրա. այդ ձևով յոյս ունէին մեղմել բուրբերին և արժանանալ նրանց բարեկամութեան: Բնորոշ է, որ այստեղ էլ առաջին սպանուողը եղան այսպէս կոչւած «քրքատը» հայերը: